

RADUNANZA CUMÜNELA

112. Protocol dals 12-02-2025 - 20.15 h

Il president cumünel, sar Romeo Cusini, po salüder 46 persunas cun dret da vuscher a la radunanza cumünela illa Seletta da la scoula primara Zuoz. S-chüso causa malatia es sar cusglier Flurin Wieser. Specielmaing bivgnainta il president las rapreschantantas e rapreschantants da las medias e duonna Annina Schöpf, giarsuna ill'administraziun, chi fo part da la radunanza per parts da sia scolaziun.

Il president cumünel constata cha l'invid cullas tractandas per la radunanza cumünela es gnieu tramiss tenor constituziun. Cunter la glista da tractandas nu do que üngünas objecziuns our dal ravuogl da la radunanza.

Scu scrutinaduors vegnan numnos e tschernieus per la vart vers la val duonna Karin Casty e duonna Andrea Hardegger per la vart vers la muntagna e la maisa dal cussagl. Il president gratulescha per la tscherna onurifica.

658 01 Organisaziun da vschinauncha
 01.C Radunanza cumünela
 01.D.01 Approvaziun protocol

1. Protocol da la radunanza cumünela dals 27 november 2024

Il protocol da la radunanza cumünela dals 27 november 2024 d'eira expost i'l internet da la vschinauncha da Zuoz (www.zuoz.ch) suot „Radunanza cumünela“ ed in chanzlia cumünela traunter ils 3 december 2024 ed ils 3 schner 2025. Ils votants e las votantas haun temp 30 dis düraunt il temp da publicaziun per inoltrer eventuels recuors cunter il protocol. Siand cha que nu d'eira il cas vela il protocol automaticamaing scu accepto. Il president ingrazcha al chanzlist per la cumpilaziun ed a l'administraziun per la publicaziun.

659 19 Bains immobigliers cumünels
 19.B Edifizis publics
 19.B.18 Posta Veglia

2. Dumanda da credit – Adattamaint adöver «Posta Veglia»

Zieva cha'l fittadin (Banca Raiffeisen) ho desdit il contrat da fittaunza per las localiteds dal plaun terrain e plaun suotterraun da la „Posta Veglia“ sülla fin da gün 2025, ho il cussagl cumünel analiso ed tratto diversas variantas per l'adöver futur da las localiteds illa „Posta Veglia“. Sün basa da la situaziun actuela ho il cussagl cumünel decis dad optimizer la situaziun per la biblioteca, chi dess nouv esser sül plaun terrain. La situaziun per la biblioteca s'amelgdescha cun esser sül plaun terrain per as preschanter eir culla vaidrina. Il plaun sur dess spordscher spazi d'abiter per indigens. Il plaun suotterraun dess esser in futur da character public e ster a disposiziun a societeds ed otras gruppas per tschantedas ed

inscunters. Eir la pussibiltad da spordscher spazi d'abiter i'l plaun suotterraun es gnida sclarida. Causa investziuns pü grandas chi füssan necessarias ed üna structura difficila per müder in spazi d'abiter, as ho sbütto l'ideja. Il cussagl cumünel dumanda ün credit da CHF 380'000 per realiser las lavuors necessarias. L'import nun es i'l preventiv 2025, causa cha la desditta da la banca Raiffeisen es entreda zieva il fer bun il preventiv. La radunanza cumünela aderescha unanimamaing a la dumanda da credit sur l'import da CHF 380'000 per realiser ils adattamaints necessaris.

- 660 01 Organisaziun da vschinauncha
 01.C Radunanza cumünela
 02.H Votaziuns ed elecziuns
 02.H.02 Tschernas da Chalandamarz

3. Propostas per las tschernas da Chalandamarz 2025

Il president cumünel declera l'agir tenor la constituziun cumünela e la situaziun cumplesiva da las tschernas da Chalandamarz e spiega las differentas caricas e düredas da telas: In blov sun las caricas in tscherna cullas personas chi's mettan darcho a disposiziun.

Presidi cumünel	Temp d'uffizi restant	Prosuma reelecziun pussibla	Remarchas
Cusini Romeo	2 ans	2027	Tscherna da rimp-lazzamaint 2023

Cussagl cumünel	Temp d'uffizi restant	Prosuma reelecziun pussibla	Remarchas
Ferrari Cristian	0 ans	2025	
Tarnuzzer Ladina	0 ans	2025	
Blumenthal Alexandra	1 an	2026	
Delnon Jachen	1 an	2026	
Zala Sandra	2 ans	2027	
Wieser Flurin	2 ans	2027	Tscherna da rimp-lazzamaint 2023

Cumischiun sindicatoria	Temp d'uffizi restant	Prosuma reelecziun pussibla	Remarchas
Arquint Niculin	0 ans	2025	
Hardegger Andrea	1 an	2026	
Bührer Alice	2 ans	2027	

Cumischiun da fabrica	Temp d'uffizi restant	Prosuma reelecziun pussibla	Remarchas
Salzmann Marco	0 ans	2025	
Albertin Remo	1 an	2026	
Camichel Lothar	2 ans	Limit da temp d'uffizi	

Cussagl da scoula	Temp d'uffizi restant	Prosuma reelecziun pussibla	Remarchas
Casty Karin	1 an	2026	

Cun quista survista es la situaziun a regard tuot las caricas preschanteda transparenta-maing. Our dal ravuogl da la radunanza nu do que üngünas dumandas u remarchas. Per las caricas in tscherna as mettan darcho a disposiziun u vegnan clamedas our da la radunanza cumünela seguaintas persunas:

Cussagl cumünel	2 sezs	Tscherna regulera	Per 3 ans
-----------------	--------	-------------------	-----------

Duonna Tarnuzzer Ladina

Sar Ferrari Cristian

Cumischiun da fabrica	1 sez	Tscherna regulera	Per 3 ans
-----------------------	-------	-------------------	-----------

Sar Salzmann Marco

Cumischiun sindicatoria	1 sez	Tscherna regulera	Per 3 ans
-------------------------	-------	-------------------	-----------

Sar Arquint Niculin

Ulteriuras propostas per las tschernas paun gnir inoltredas fin venderdi, ils 14 favrer 2025 a las 16:00h, in scrit sülla chanzlia cumünela.

661 01 Organisaziun da vschinauncha
 01.C Radunanza cumünela
 01.C.05 Infurmaziuns

4. Orientaziuns

Il president orientescha sur da differentas fatschendas chi occupan il cussagl cumünel, impustüt affers cun ün'influenza finanzia:

Temas da la Regiun Malögia:

- Provedimaint da sandet in Engiadin'Ota
- Aeroport regiunel Samedan (INFRA)
- Sanaziun deponia Sass Grand a Bever

- Sanaziun Chesa Ruppaner a Samedan ed otras immobiglias in possess da la Regiun Malögia

Temas cumünels:

- Adattamaint da la structura da la societad «Engiadina Plaiv Turissem (EPT)
- Infrastructura da basa
 - Sanaziuns da l'infrastructura dad ova potabla
 - Sanaziun u fabrica nouv stabel da scoula
 - Svilup areal Staziun
 - Rundella Resgia
- Infrastructuras turisticas
 - Ova d'adöver per innaivamaint da pistas e loipas
 - Fabrica nouva s-chabellera Pizzet
 - Gletsch artificial
 - Infrastructura turistica per la stagiun da sted
- Infrastructura generela
 - Sanaziun vias ed igluminaziun
 - Depot per immundizchas e s-chart verd
 - Sanaziun dad alps e vias d'alp
 - Sanaziun clucher San Luzi
 - Ingrandimaint Parkegi Centrel

Quist es üna survista da temas chi occupan il cussagl cumünel ed es scu quintessenza oblio da's dedicher intensivmaing eir als temas finanzas ed impostas. Per la finanziaziun da tuot ils progets chi sun a cuorta e media vista da realiser in vschinauncha u illa regiun metta il president invista cha'l cussagl cumünel e la radunanza cumünela haun eir da tratter ün augmoint da las impostas cumünelas e las impostas süllas immobiglias.

662	01	Organisaziun da vschinauncha
	01.C	Radunanza cumünela
	01.D.02	Varia
		Varia

Il president infurmescha sur dals success dals fradgliuns Nicola e Gian Andri Bolinger, chi participeschan a competiziuns da Freeski da la coppa mundiela e la coppa d'Europa. Nicola ho d'incuort raggiunt illa coppa d'Europa a La Clusaz in Frauntscha la terza piazza i'l «Big Air» e dafatta guadagno i'l „Slopestyle“. Gian Andri da sia vart ho raggiunt ad Aspen i'ls Stedis Unieus la prüma vouta ün finel da la coppa mundiela ed ho fat la 16evla piazza. In nom da la vschinauncha da Zuoz gratulescha il president als giuvens ambassaduors Zuozinghers.

Ün votant dumanda da nouv, che chi capita cullas localiteds illa Resgia cha la ditte Schwab vaiva piglio a fit, ma ho intaunt abanduno. Il president explicha cha'l cussagl cumünel spetta giò la planisaziun dal lö, chi vess i'l cuors da l'an da gnir delibereda da la radunanza cumünela, per agir in chosa. Ils discuors cun pussibels investuors, chi vaivan exprimieu ün interess, vegnan alura darcho piglios sü.

Zieva cha nu vain pü dumando il pled, infurmescha il president sur da termins. Ils 19 marz 2025 a las 19:00h ho lö üna saireda d'infurmaziun da la fundaziun pel provedimaint da sandet Engiadin'Ota a regard il futur. Las prosmas radunanzas cumünelas haun lö la fin marz a regard infrastructura turistica ed ils 30 avrigl 2025 a regard il provedimaint da sandet in Engiadin'Ota. Il president sperescha sün üna partecipaziun numerusa. El

ingrazcha a las votantas ed als votants per la cumparsa e serra la radunanza a las 20:40h
in giavüschand a tuots üna bella saira.

Il president In buna fè l'actuar

Data da publicaziun:
Zuoz, ils 26 favrer 2025